

## Uunga allannguutissatut siunnersuut

**Uunga siunnersuut: Allakkerineq pillugu Inatsisartut peqqussutaat nr. xx, xx. xxxx 2011-imeersoq**

Aappassaaneerinninnermut Naalakkersuisunit saqqummiunneqartoq.

## Kapitali 3-mut

1. Kapitalip qulequtaa ima oqaasertalerneqassaaq:

*”POST Greenlandip ingerlassinissamut pisussaaffii, agguaasarnissamut pisussaaffii aamma taarsiissuteqartarnera”*

2. § 22 ima oqaasertalerneqassaaq:

**”§ 22.** POST Greenlandip atuisartunit naammagittaalliuutit suliarisassavai, taakkununga ilanngullugit nassiussanik tammartoqarnera, tillittoqarnera ajoqusertoqarneralu pillugit.

*Imm. 2.* POST Greenlandip allatut immikkut pisoqanngippat naammagittaalliuut tiguneranit qaammatit pingasut ingerlanerini suliarissavaa.”

3. § 22-p kingorna § 22a nutaaq ima oqaasertalik ikkunneqassaaq:

**”§ 22a.** POST Greenlandip aalajangiineri Naalakkersuisunut naammagittaalliuutigineqarsinnaapput, taamaattorli takuuk imm. 2.

*Imm. 2.* Aalajangiinerup naammagittaalliuutigineqartup tiguneranit sap.ak. sisamat ingerlanerini naammagittaalliummik tunniussisoqassaaq.”

Siunnersuummut nassuiaatit

**Nassuiaatit nalinginnaasut**

Allannguutissatut siunnersuummi siunertaavoq Inatsisartut inatsisaanni taarsiissuteqartarneq pillugu aalajangersakkap tunngaviusup inissinneqarnerata erseqqissaqqinneqarnissaa.

Tamatuma saniatigut naammagittaalliorsinnaaneq pillugu aalajangersagaq siunnersuummi erseqqissarneqarpoq, taamaalilluni Inatsisartut inatsisaat innuttaasut naammagittaalliuutinut atatillugu pisinnaatitaaffii pillugit aalajangersakkanik tamarmiusunik imaqalersillugu.

Siunissami nalunaarutissaq naammagittaalliorsinnaaneq pillugu aalajangersagartaqassanngilaq.

**Aalajangersakkanut ataasiakkaanut nassuiaatit***Nr. 1-imut*

Taarsiissuteqartarneq pillugu nalunaarutitut malittarisassiornissamut tunngavissap inissinneqarnera pillugu Inatsisartut inatsisaanni erseqqissaasoqannginneranik

Attaveqatigiinnermut Ineqarnermullu Ataatsimiititaliap oqaatigisai Naalakkersuisut isumaqatigaat. Taamaattumik kapitali 3-p qulequtaa erseqqissarneqarpoq oqaaseq ”taarsiissuteqartarneralu” ilanngunneqarluni.

*Nr. 2-mut*

Attaveqatigiinnermut Ineqarnermullu Ataatsimiititaliap inassuteqaataa Naalakkersuisut isumaqatigaat, tamatumani kissaatigineqarluni naammagittaalliorarneq pillugu aalajangersakkat tamarmik Inatsisartut inatsisaanniitinneqassasut taamaalillunilu Inatsisartut inatsisaat nalunaarummilu aalajangersakkat erseqqinnerusut naapertorlugit piginnaatitaaneq pillugu aalajangersaaginnarani. Aalajangersakkami POST Greenland atuisartunit naammagittaalliuutinik suliaqartarnissamik peqquneqarpoq. Naammagittaalliuutigineqarsinnaasut pillugit tamakkiisuunngitsumik allattuisoqarpoq. Tamatuma saniatigut imm. 2-mi aalajangersarneqarpoq POST Greenlandip naammagittaalliuut tiguineranit qaammatit pingasut qaangiutsinnagit suliarissagaa. Immikkut pisutut taaneqarsinnaapput suliap paasiuminaatsortai, paasissutissanik pissarsiniarneq kiisalu ilisimasalimmit ikiorteqarneq. Taamaattorli allanik pisoqarsinnaavoq suliarinniffissamik sivitsorsaataasunik.

*Nr. 3-mut*

Naammagittaalliorsinnaaneq pillugu malittarisassat Inatsisartut inatsisaanni ataatsimoortinneqarnissaannik kissaateqarnerup pissusissamisoortumik kingunerisaatut aalajangersakkamik nutaamik § 22a-tut ilusilimmik ilanngussisoqartariaqarsimavoq. Aalajangersakkami POST Greenlandip taarsiissuteqarnissaq pillugu aalajangiinerisa Naalakkersuisunut naammagittaalliuutigineqarsinnaanerat tunngavissinneqarpoq. Naammagittaalliuutit tunniunneqarnissaannut imm. 2-mi piffissaliisoqarpoq. Erseqqisumik eqqortumillu piffissaliinissaq naapertuussorineqarpoq taamaattumillu POST Greenlandip aalajangiineranik tigusinermiit sap.ak. sisamat piffissaliunneqarlutik.